

■ GLOSSA

Betg pli sacrosanct!

DA SILVIO CAMENISCH

Sch'il Creatur, der Schöpfer, dastgass, na dastga betg ma dastgass, co votass uss El? Era cun in massiv NA da sortir a la prescha da l'energia nucleara? Pro atom vinavant enavant senza nauscha conscienza? Sinceramain, u mo per spass? Gist quella partida? Defensura e protectura suprema da «nossas valurs» nun negoziablas. Unverhandelbar. Tuts umans en Svizra, er immigrants, han da respectar il fundament da valurs cristianas, das christliche Wertefundament!, uschia il nov chau da partida vers las medias.

La responsabilidad visavi la Lcreaziun. Betg pli sacrosanct, betg pli trais giadas sontg? Dat mo ina. U datti en vossa stizun Coop l'acziun: Hit da l'emna: 2 chommas-portg per 1, profitar e comprar! Tge èsi cun il quità per generaziuns futuras? Tge faschain nus cun adina dapli rument mortal anc millis onns, gea per l'eternità? Dastgan gugent ertar noss ufants, biadis, sutbiadis. Quai è era politica da famiglia a lunga vista. Grazie.

Sche nus lain bun clima, en chasa e dator, en il



parc, èn ils «noss» pro atom anc ditg, vai suenter ils capo tenors, quels cun il «C» aut en la gula e sin ils culiers. Ils ruments tschufs, vul insatgi quels? Nagin? Vul la bella Moldavia els? Ins survegn ils bastuns nuclears gratuit, ma stuess vegnir sez per els e sez transportar davent els, ils bastuns nuclears. Ils tenors da la politica burgaisa dastgan star, il pievel dovra quels anc ditg.

Il meglier sut terra. Burca surengiu. Or dals eglis, or dal cor. Insatgi survegn quels sut letg en. Insatgi ha da surpender els. Nus savain sfurzar, so, meglier gist s'annunziar. Vischnancas che s'annunzian sco emprimas, han da bun il maximum dals tschains da dismessa, subvenziuns, i sa pajà per saldo. Va adina per daners, maximar gudogns.

Dals gudogns dependa tut, hulapalu, vid ils gudogns sa penda tut. Quella cun il martello en ses modest num, quella betg!

Ins sto chapir quella veglia partida sin via vers la moderna, la «PCD 2025». Ins ha perdì la basa, tschertga ussa la spersa en il stgir, en il parc, cun chauns da chatscha aposta da partida. Quels èn dressads giu bain, quels vegnan enavos cun la sa persa. Il nov chau è motivà, el è vilà. Quel ha il feu sacré, sacrament, quel fa guttas cun chau. Nus esan èn in process da renovaziun. Tuts enavos, enavos! El pretenda dapli piz e chantuns. Avain nus dus buns scrinaris? Noss profil è unscharf, nus lain paiverscharf! Auters han er, pertge nus betg er, ed han l'entir pievel enturn il det. Tai er, gea, ti es manegià!

Nus irritain, nus vilentain, nus gratulain uss ina giada cun pro atom vinavant enavant e pront vegnan ils adversaris nana-vant. Fa nagut. Ina partida ha mo lura success, sch'ella ha adversaris. Ed il «hulapalu» è ch'ins discorra pupsè intensiv da la pcd!